

四庫全書

集部

欽定四庫全書

青山集卷十四

宋 郭祥正 撰

長句古詩

前雲居行寄元禪師

憶雲居乃在匯澤西南脩川之隅山盤盤兮石門屹立  
磴道絕飛瀑萬丈淙冰壺雲沈沈兮方晝而忽暝古木  
交錯兮藏鼯鼯攀崖欲上復自止投險却憶騎鯨魚崖  
向時復造平野絕頂乃有百頃之膏腴羣山下瞰若聚

米殿閣枕藉非人區露華洗出太古月桂子搖落陰扶  
疎清風欲借羽儀展穢念頓覺秋毫無老禪底事不度  
我紅日東上還驅車如今正似武陵客放舟已遠嗟迷  
途青春一往二十二白雪漸變千莖鬚西來忽遇歸飛  
鳥青紙遠寄黃金書靈茶香味勝粉乳滿篋所贈遇瓊  
琚玉川七椀喫不得灌頂未識真醍醐南暹北訥惜已  
死唯師秀出孤峯孤潛深隱密自得所豈不憫我棲榛  
蕪倒影射巖猶入石異日三椽容野夫

後雲居行寄和禪師

我所思兮歐山之顛白石蒼木蔽窺而隔世兮路通乎  
兜率之天層樓複閣觸峙絢爛往即造兮雲渤興而漣  
漫徙倚恍惚若奪吾魄兮聊枚曠以盤桓徐風生而霧  
散卷綃縠于林端泊天清而日上兮瀑峻飛而潺湲畜  
而為潭泄而為澗運之以車兮盈乎大田然復度石橋  
登重門睹篆玉之榜謁金仙之尊徒衆五百龐眉皓首  
形儀靜而不雜兮語言要而不煩齊興止以鐘鼓兮善

後先而靡難舉正眼而諦瞬兮了無一法之可觀寂兮  
樂兮妙復妙兮其惟真如之禪我請棄冠釋帶以投依  
兮師則指乎未契之緣于是曳屣却步循磴道而復返  
兮歲眇眇而屢殘觸網羅以系累兮方傷羽而戢翰悵  
昨游而欲再兮庶已創而復完亂曰疇將歸兮卧龍之  
室依人道師成佛而出

贈潛山伊居哲先生

伊君頭戴星文冠遨遊五嶽何時還結茅却在潛山裏

閑息自養丹田丹聞說年齡七十九髮如鵝青亦稀有  
生平讀盡道藏書寓興成詩僅千首清風生我太古絃  
彈罷時傾一壺酒門前手植數本松看爾凌雲比予壽  
高奔日月瞻玉京陰氣鍊盡陽氣成行聞北帝呼六丁  
紫書下詔鸞鳳迎潛山空留千載名白雲不斷溪長清

贈桐城青山隱者裴材

青山為主身為客主人借客青山宅白雲自在千里飛  
長松不換三冬碧藤枯誰與寫作龍龜老何年化為石

落花隨水春深源鳴雁過江悲晚色家無妻子心無累  
頂冒寒霜踵藏息月明舞影聊盡歡一點塵寰不留迹  
倘來軒冕真可嗟朝為公卿暮遭謫屈原賈誼爾為誰  
問君何似青山客

寄劉繼鄴秀才

憶昔重遊樂尋春之宛陵天機織出萬山錦虹橋倒影  
銀河明游絲縈空白日暖好鳥亂響清風生疊嶂樓中  
索美酒坐上客子皆豪英諸姬合雜卷絃管一人妙唱

為并瓊玉板斜開厚冰裂鴛鴦索拍秋波橫酒盞貪歡  
不知數夢入瑤池逃宿醒誰知一別萬事錯荷衣倒著  
來江城青雲散盡落青野長絲掣斷無長鯨鄉山好在  
却歸去當共故人吟此情

題杏山阮氏高居

仙翁得仙朝玉皇當時種杏盈山岡傳聞落英堰流水  
每到三月溪泉香白雲霏霏出幽谷獨鶴沈沈唳喬木  
寒潭深處睡蟠龍靈草芳時躍青鹿丈人何年居此間



說說孫子如芝蘭抱才求進十五六亦有隨計鄉書還  
步兵傲世逸千載誰道風流至今在軟炊玉粒烹黃雞  
客子雖多竟相待我愛長吟登好山到此便欲辭塵寰  
可能築室輒延我為君鍊熟黃金丹丹成大笑分一粒  
坐令綠髮回朱顏浮生百歲不早悟日月擾擾空循環

杏山葛洪種  
杏煉丹之地

銅山寺

田塍行盡蒼山轉溪水滔滔晴曝練馬蹄怯石鞭不行

十步九蹶令人倦黃昏到寺亟就榻山僧苦來邀我飯  
香粳新收野菜肥一飽令人百憂散篆香欲盡象燈暗  
林聲敲敲苦霜霰暫來福地能清虛何用致身居諍諫

隱靜寺

門橫大溪溪淨碧人不捕魚魚穩潛哀猿長嘯霧垂地  
饑虎一聲風動簾金仙像古苔蘚剝鐵磬夜敲規矩嚴  
道師達性傲時輩不信書生來養恬

碧霄峯下車輪停道師未返誰逢迎山雲著地雨正急

春水滿田人不耕  
饑虎嘯風大石裂  
倦鳥喚雛深澗鳴  
客心欲去且復止  
坐飽香飯餘何營

浮丘觀

仙翁得仙二千載  
滄海變田田變海  
浮丘却接番禺西  
罇跡蒿痕至今在  
朱明之門敲不謗  
荆榛滿地誰重興  
史君舉意要卜築  
樓觀矗雲如化城  
李白騎鯨下蓬島  
嫦娥洗月來滄溟  
相逢且勸百壺酒  
蟠桃結實何時成  
史君自有神仙骨  
往往前身尋舊物  
手探樹穴求玉環

肩拍洪崖猶髣髴更提椽筆揮長篇至理直欲追玄元  
行當跨鳳返金闕回首番禺空紫烟

明皇十眉圖

明皇逸事傳十眉正是唐家零落時霓裳曲調雖依舊  
阿蠻終不似楊妃畫工貌得非無意欲使流傳警來世  
翠翹紅粉尚爭春隱約香風起仙袂六龍真馭竟何之  
泰陵荒草長狐狸空將妙筆勸樽酒醉覺人間萬事非

九疑山圖

噫吁嚱九疑山色何雄奇坡陀詰曲不足狀九峯萬丈  
排天靡嶄嶄儼若九老坐乾顛坤弱能扶持崖回時復  
見華塵原本旋有山經題白雲綿聯芳草歇拱木夭矯  
狂風吹上有源源不絕之寒泉下有汙汙不斷之深溪  
初疑青銅照碧落忽見雲漢飛虹霓丹青畫出尚如此  
而況高步窮嶇崎或云重瞳一來不復返二妃血淚斑  
竹枝惜哉不經孔子辨後世誰能公是非堯非幽囚舜  
不野死堯崩民如喪考妣舜非游仙而幸此羣猪聳耳

聽童子游人擊之變風雨見豕負塗聖所惡仙人護之  
亦何補我知神仙術已卑但愛此山雄而奇背圖南望  
未能到高吟盡日長吁噉

醉歌謝太平李倅自明除夜惠酒

一年醉三百六十日今朝年盡酒未盡自顧形骸無得  
失浮生七十行六十猛飲狂歌須汲汲吾邦倅貳李自  
明愛我頽然荷蓑笠雙壺滿送瓊瑤漿春風爭從四支  
入君不見劉項存亡安在哉暫時龍虎轟風雷袁盎說

行晁錯戮躡蹠刺客橫刀來又云舜野死堯幽囚九疑  
連延雲霧愁不如飲酒醒復醉抱甕負鍤渠無仇滄海  
化為酒蓬萊作糟丘與君攜手去赤脚踏鰲頭

同蔣穎叔林和中游鬱孤臺

匹馬初從瘴嶺來登臨喜上鬱孤臺鬱然而孤插天半  
亂山却出晴雲堆雙溪倒流玉綃風萬屋蘸碧長城開  
捫參歷井豈足數俯欄引手持斗魁月空銀浪試一酌  
坐憂桂樹生黃埃妙娥舞袖迴白雪琵琶十面東春雷

吟牋分軸造險語酒令行賞無停盃  
哀猿不斷片帆沒  
歸鳥自送殘陽頽脫身我作耕釣客  
兩翁均是巖廊材  
共游絕境發佳唱驪珠射目精光皚  
升沈從此遂分手  
願借惠澤蘇蒿萊

贈南康劉叔和秀才

俊才落落如君少養之九年應大妙  
滿懷騷雅輒見投  
圭璧琮璜予所要勸君且學充其科  
殿前筆陳揮長戈  
錦標奪取獻天子寵祿及親榮耀多



姑蘇行送胡唐臣奉議入幕

登姑蘇望五湖范蠡扁舟竟何在吳王宮殿惟荒墟民  
貪吏狡郡多事煮鹽為盜無完膚使君誰何好平恕寬  
則脂韋猛則虎只今卧治聞黃公更得高才歸幕府願  
令里巷歌召南風化流行成樂土昔年引對大明殿國  
論軒軒動人主往持使節臨朔方威霽秋霜愛春雨玉  
上青蠅誰強指鼻端有堊寧傷斧升沈偶爾非吾嗟不  
用東方且為鼠豈聞絕代無佳人何必西施妙歌舞咸

傾綠酒。鱸肥鱸承詔。還從大梁去。

擬桃花歌

酣酣桃始花。灼灼粉面笑。粉色射花光。奪盡丹青妙。藍  
衫馬上郎。風流亦年少。語言雖未通。精誠默相照。斂容  
緩步復掩門。只見桃花不見人。輕紅淺白正含露。欲落  
半開將送春。凝心駐馬日漸晚。隱忍時時下前坂。回頭  
又不見桃花。唯有青山遮。醉眼揚鞭擊鐙歌。團扇相見  
不如不相見。逢人寄語問桃花。春殘吹洗落誰家。

怡軒吟贈番陽張孝子

古云蜀道難蜀道之難難於上青天孝子尋親不辭遠  
草躋負米離番川西從荊州望夔國捫蘿躡石穿林巔  
峽山愈深人迹絕但聞悲風冷澗聲潺湲汲溪鑽火行  
復飡夜宿茅屋衣裳單迴看江南路九千一見歸客吞  
悲酸寄聲吾母形骸安慎勿為語皮皴乾涪州城西遇  
征蠻城門防盜白晝關撫膺仰天涕洟瀾見親之難難  
於蜀道難成都漸近心稍寬踴躍可得瞻耆顏父昔離

家子方孕子得見父今壯年胡弗歸兮死敢請慰我慈  
母心懸懸三往三返又十載孝子執轡方言還番人聞  
歸競嗟喜夫婦白首重團圓誅茅立屋奉甘旨陳侯篆  
榜名怡軒春禽提壺助春飲綵衣自舞春風前腰金饌  
玉非我欲但願眉壽雙松堅朝熙熙暮熙熙誰將朱絲  
繩奏我怡軒詩

憶敬亭山作

忽憶敬亭山翠碧千萬尋白雲拂地弄晴影黃猿嘯晚

清人心桃花流水三月深柳絮披烟辭故林重樓複殿  
据山脚像塑制度祠非淫晉時謝守曾賽雨至今石上  
鐫遺吟五言雅重參二典琅琅一誦鏗璆琳綠潭無底  
白玉沈千載何人知此音李白騎鯨出滄海回鞭曾宿  
崑崙岑却泛虛舟弄溪月紫霞之杯傾不歇醉來更約  
崔宗之秋水玄談清興發數公逸駕何當還悵望英風  
不可攀信道相看兩不厭古來只有敬亭山

青山集卷十四

欽定四庫全書

集部

青山集卷十五至十九

詳校官中書臣閔思毅

侍讀臣孫球覆勘

覆校官博士臣劉光第

校對官中書臣王璦

謄錄監生臣藍嘉璐

欽定四庫全書

青山集卷十五

宋 郭祥正 撰

長句古詩

鄭州太守王龍圖

贊之

出家妓彈琵琶即席有

贈

偶騎匹馬游仙關瑤池夜宴歡未闌邀予未坐聞清彈  
琵琶十槽聲正繁初疑饑鸞咏玉應天響忽似霹靂數  
聲春氣還曲徧將終檀板急舞袖裂霞隨拍入踏碎瓊

筵鸞步嬌汗透香綃露桃濕解條罷舞整花鈿宛轉仙  
容雁行立主人使令持酒卮香隨羅襪成塵飛銅龍無  
聲夜無極煌煌燭焰回朝暉桃源花落長溪淨人著秦  
衣樽俎罄豈如此會絕風流主人慇懃賓客敬我作短  
歌公聽取人世百年能幾許樂極哀來古所悲不如立  
功當此時

瑞昌雙溪堂夜飲呈吳令

子正

星斗闌干月未吐但愛溪聲似山雨青燈照室並銀花



白酒傾來不知數子善評文我不如我亦談詩子深許  
酒酣索我須論兵拔劍畫地軍陣成十萬甲兵指掌取  
五方應敵旋風生文武道判惜已久聖賢相遇猶難并  
相如謾作長門賦屈原虛著離騷經不知於世竟何補  
可憐博得千年名韓信收身苦不早功成伏劍真草草  
始終最愛嚴子陵坐視乾坤任傾倒咄嗟語險氣已傷  
况復賦詩聲調長卷紙連書不磨琢子鋒大峻非我當  
撥置萬慮付江海收拾寸心歸老莊天地得一馬喻馬

謂思前事皆佯狂

寄吳著作

憶與君別時君行朝北極潯陽江頭車馬光意氣翩翩  
動秋色君還舊廬能寄書謂我楚辭傳上都是時盜賊  
正紛擾日夜奔走承使符謝君後時間已惡

遇各切

交深

豈必書問數誠明相照期無窮但惜遠別臨春風春風  
來已老落盡桃花紅有時孤坐碧山裏彈指倏忽成衰  
翁文章不直一杯酒功名付與千年松何時逢君談豁

我此愁恨攀雲不見麒麟蹤趨泥自笑駑駘鈍兒女安  
否今何如親雖未成交莫疎願君富貴情不改敢將瓦  
礫贈明珠

將至江夏先寄太守李學士

公擇

二月發姑孰三月到潯陽聞君解纜纔五日驥尾難追  
空斷腸十年前作潯陽吏老校相逢猶引避中丞孤憤  
已沈泉時事愈新誰敢議欲吐哀音寫心曲濛濛江聲  
搖地軸橫琴靜夜按金徽泛到商絃斷還續憂能損氣

須忘憂移船漸近黃鶴樓樓前芳草漬烟碧君今賢過  
奇章侯試詢樂部誰工笛曹王舊曲何人識水中龍應  
雲不飛月華正在江心白滿傾綠酒濃如油為君吞却  
鸚鵡洲開帆快意出天外可惜礙斷長江流

予嘗尉潯陽日事故

中丞呂  
獻可

蔣公櫓呈淮南運使金部

穎叔

此櫓係魯侍郎

漕淮日手植

淮南庭中有蒼櫓仰視團團翠為蓋直幹每容鸞鳳棲

盤根深壓鯨鰲背北風夜作兵陣聲恐取蛟龍斬天外  
呼童出屋為我窺摩颭清陰月光碎問誰植之前蔣公  
得地條經三十載不同種杏上青天正似甘棠有遺愛  
使華今復見公孫太平事業鍾一門祖廟冠蓋漸塵土  
却嗟此檜春長存孤高豈忘栽培力秀發兼承造化恩  
已看枝葉飽霜露終作棟柱扶乾坤新詩編聯盡珠玉  
光大先烈聽簾壘更憶丹青妙畫手進入明堂奉至尊

蜀道篇送別府尹吳龍圖

仲庶

長吟李白蜀道難蜀道之難難於上青天長蛇并猛虎  
殺人吮血毒氣何腥膻錦城雖樂不可到側身西望泣  
涕空漣漣其辭辛酸語勢險有如曲折頓挫萬丈之洪  
泉世人不識賢玉璞每欲酬價齊刀鉛求之往古疑未  
有惜哉不經孔子之手加鑱鐫公今易節帥蜀國為公  
重吟蜀道篇旌旗翻空度劔閣甲光照雪參林顛雲鼇  
連推谷聲碎畫角慢引斜陽懸竹馬爭迎舊令尹指公  
長髯皓素非往年蜀道何坦然和氣拂拂回屋蹀長蛇

深潛猛虎伏但愛雄飛呼雌響亮調朱絃時乎樂哉公  
之往也九重深拱堯舜聖廟堂論道邱軻賢撫綏斯民  
賴良守平平政化公能宣來賓興學有源本何必早夜  
開華筵嘗聞家家賣釵釧只待看舞青春前此風不革  
久愈薄稔歲往往成凶年噫吁嘻今我無匹馬安得從  
公遊盡書政績來中州獻之明堂付太史陛下請損西  
顧憂

錢塘行送別簽判李太博

獻甫

東南會府唯錢塘高門雙開南斗傍門前碧瓦十萬戶  
曉色滿城烟雨香聖祖神宗造區宇應命最先吳越王  
不經兵火二百載地饒沃衍民康強蓮花紅白西湖芳  
南山翠影臨滄浪瓊樓寶塔照日月塵埃不到炎天涼  
畫船羅幕盡高卷白玉美人游冶郎年年中秋海潮過  
萬頃銀山面前墮少年輕命爭弄潮手掣紅旗逆潮簸  
聞君此行承辟書伯樂能求汗血駒四時風物同吟嘯  
十郡兵民歸卷舒公閒畜德聊自養承平功業還吾儒



況君登朝未四十慎勿出處窮歡娛慎勿出處窮歡娛  
臨淵履冰佩瓊琚

天台行送施山人

平生樂山水聽客談天台盤石摩挲浸海月瀑布淙射  
烟霞開山腰噴作千巖雨潭底晝夜轟風雷諸峯攢叢  
護寶剎地與世隔無纖埃仙葩靈鳥四時有石砭玉洞  
清風來施夫子欲長往高謝功名脫塵網況有西來老  
師師了悟無生任消長若許陶潛載酒過便駕蒼虬逐

真賞

蹠蹠行送裴山人

蹠蹠蹠蹠裴山人破帽麻衣被埃塵忽來訪我環峯市  
醉倒不顧傍人嗔壯士不得志汙泥困脩鱗誰傾滄海  
救枯澤矯首奮鬣乘風雲回頭問燕雀爾輩胡為羣巢  
寄栢梁一朝火孤棲風雨更誰隣蹠蹠蹠蹠裴山人行  
路無窮鼻酸辛元通獻甫儻不遇况有特達朱純臣蹠  
蹠勿蹠蹠豈有壯士長遭屯

道林寺送別崔提刑

用沈傳師酬唐  
侍御姚員外韻

湘江傾瀉明河源  
湘山來落如駿奔  
尋幽乘興莫辭遠  
白雲中有黃金園  
佛師無心法愈密  
徒衆先後陳卑尊  
甘泉噴灑仙籟爽  
此身已覺超籠樊  
高堂却見山外水  
古鑑磨開蒼蘚昏  
長城深鎖萬家富  
老木自作千營屯  
兩洲半沒鯨鼓鬣  
雙崖斗起天為門  
滄溟不識幾番變  
石泐猶有濤深痕  
茯苓愈大愈堪食  
深鋤但惜傷松根  
登高覽物亦徒爾  
秋色況是當離樽  
崔侯才思銳無敵

蒼鷹得免霜翎翻翻嗟余染翰愧復正累句何足先行軒  
故人柄政坐東府請君獻策安黎元

游石盆寺呈蔣殿院兼簡余光祿

石盆古寺蒼崖顛斷碑敝剝無人傳其文僅識隱巖字  
御史飽學能推研乃是鄭董之別號洛師易節來刺宣  
風流直欲繼謝守行春車馬時聯翩紅粉行行杭音杏花

笑旌旛爍爍雌霓懸松聲颼颼雜簫鼓薛園繚繞疑檀  
烟不知身世有軒冕且將樽酒投林泉暫時樂事亦難

遇高文大字精磨鐫可嗟榛棘一藏晦清風零落三百  
年洎逢佳士始珍賞洗滌塵垢邀神仙坐思往迹若夢  
寐明河千丈傾辭源啼鳥至今不避客上下啾聒兩耳  
邊山僧構亭又高絕羣峯葉葉如青蓮崔嵬寶塔掛落  
日沆碣冰壺撐釣船余公胡為未嘗到美景若此寧棄  
捐請攜吟筆窺造物更向雲中調管絃

凌敲臺呈同游李察推

公擇

臘月欲盡春風來壯士尋春上高臺金烏慢飛光徘徊

照散冰霜天地開  
梅花披香柳烟裊  
狂殺錢塘蘇小小  
玉簫金笛鳴高樓  
悵望傳書落青鳥  
吾曹強飲三百杯  
老去功名安在哉  
欲駕飛魚入東海  
王母為我傾金罍  
蓮華變碧蟠桃熟  
仙家四時應不速  
醉來拍手乘紫烟  
游徧洞天三十六  
高歌杳渺春風裏  
我懷清澈西江水  
腐儒往往往哈吾  
狂猶幸揚雄作知己  
脫君身上蜀錦袍  
解我腰下并州刀  
更沽美酒共君飲  
不負今朝春思豪  
凌鼓臺呈同游張兵部朱太守

江東使者武陵仙姑孰太守南都賢同時文采耀場屋  
今日寵榮分使權歲豐民樂官吏肅登高望遠開華筵  
凌敲古臺壓城北天門牛渚遙相連六朝盛事竟何在  
白雲芳草空綿聯黃鳥聲酸落花雨青蒲風送西江船  
鳥聲繚亂帆影沒勸君莫負杯中物百歲榮華如轉輪  
一半光陰已倉卒寧須雜管絃不必煩綺羅紫萼煮豉  
肥鱸膾更聽江南賤士歌堯崩舜立天下治廟室靈芝  
最為瑞巖穴自此無遺民請把長戈鑄農器功名來時

如等閒四皓去矣誰復還一朝攘臂揖太子社稷不動  
安如山可笑屈夫子憔悴長江濱欲將獨醒換衆醉竟  
葬江魚愁殺人古來得失既如此今朝幸會青雲士功  
成早晚歸桃源回首塵寰脫雙屣

嵩山歸送劉伯壽秘監

松荒菊老嵩山秋翁將歸兮邈難留幅巾短袖騎黃牛  
脩然自作山中游山中游誰與伴兩姬窈窕吹牙管千  
巖萬壑鸞鳳吟嫦娥側耳冰輪欸五音和暢王道成不



是嵇康廣陵散問公此曲誰為之曲曲新翻公自為古  
人今人不到處能與陰陽四序相推移我知公心通造  
物豈止人間妙音律天子呼來換舊章樂成四十有五  
日奏之明堂奉祖宗天地清明和氣溢至尊寵賜腰橫  
金自謂榮華非本心再拜辭魏闕揚鞭歸故林故林在  
嵩山白雲幽徑深濯我衣上塵重瀉山水音只應王子  
晉跨鶴每相尋

月下獨酌二首

長空無雲江水淨月出東方掛金鏡我時有酒何處斟  
破碎寒光借漁艇便邀玉兔乞靈藥一粒為醫天下病  
玉兔既不報我亦醉不知舟人解事喚我起月輪已轉  
西山西人間萬事不可了且與明月閒相隨

明月不解飲何事解照琉璃鍾金波蕩漾使我惜不徹  
一酌萬事逃心胸良時忍自棄聖代真難逢生平不知  
耕與戰唯知猛飲大笑吟清風竹林七子豈足數淵明  
五柳方途窮一身不為萬乘屈傲笑嚴陵垂釣翁明朝

官滿歸去來  
分但願月輪不缺樽酒不空  
吾君萬歲坐  
法宮四海長靜無兵戎

青山集卷十五

欽定四庫全書

青山集卷十六

宋 郭祥正 撰

雜題古詩

白玉笙

白玉笙咸通十三年琢成琢成匠人十指禿進奉明堂  
聲妙曲當時應賜恩澤家流傳至煜煜好奢高堂日日  
聽吹笙不知國內非和平仁兵萬衆一旦至國破蒼黃  
笙墮地雖然訛缺未苦多却落人間為寶器管長纖纖

剝筍束況值吳姬指如玉不見排星換掩時自然天韻  
來相續昔時禍亂曲今日太平歌興亡不繫白玉笙但  
看君王政若何

金斝斗

金斝斗酌醇酒斝開萬斛之愁腸贈爾千年之眉壽酣  
酣笑臉坐生春安用逢人嗟白首

翠碧盃

翠碧盃滿酌正是桃花開一年三百六十日幾人待得

春歸來春歸來不飲酒翠碧之盃爾何有

魏王臺

金城東百尺高臺臨遠空  
長江浩蕩劒門險欲平  
吳蜀難為功誰傾黃金建佛廟  
擊鼓撞鐘夜還曉香厨供辦  
老僧閒玉欄花謝游人少  
我來獨立想英雄戰艦連雲  
氣槩中猶有斯臺存舊址  
可憐銅雀起悲風

藏舟浦

金城北荒荒野水連雲  
白島嶼相望一徑通遠堤楊柳

迷春色天下三分血戰秋張遼鑿浦暗藏舟吳蜀雖亡  
晉已起山川自結寒烟愁永平只作尋春處關門鑊斷  
春歸路畫船載酒歌白紵不忍醒時送春去

悲陽春

悲陽春陽春可樂胡為悲桃花枝上開未足數片已逐  
狂風吹陽春能來不能久年少看花今白首擊毬馳馬  
力已疲欲傍樽壘先怕酒佳人如皓月顧我猶衰蓬相  
倚不相似兩心何可同請折並蒂花更看鴛鴦鳥容華



與毛羽相鮮乃為好揮手謝佳人  
浩歌悲陽春陽春易  
衰歇爾貌豈長新

江上游

我乘逸興浮扁舟楊花渡江飛滿頭  
河豚初熟鱖魚爛  
借問春光須少留人間乍聽黃金鳥  
物外誰憐白雪鷗  
但願滄波化為酒青山兩岸皆糟丘  
人生快意天地小  
登覽何必須瀛洲漁歌聲斷自起舞  
酩酊更看江月流

望夫石

杜鵑啼血春林碧，妾有離愁異令昔。上盡高山第一峯，  
目亂魂飛化為石。化為石可奈何，淚懸白露衣薜蘿。千  
古萬古望夫恨，一江秋水寒蟾多。漢家天子點征役，良  
人荷戈歸不得。此身未老將何從，不似山頭化為石。

兩山間

江南南山連北山，蒼藤翠水潺潺水。深藤老木拱矣  
不知遊子何時還，白雲孤飛歲華晚。獨鶴一聲星斗殘，  
兩山秀色手可攬。嗟我不得山中閒。

蓮根有長絲

蓮根有長絲不供貧女機  
柳梢有飛綿不暖寒者衣  
朝歌悠悠暮歌短下地沈沈上天遠  
東生白日還西流志士長懷萬古愁

朝出青閨裏

朝出青閨裏自汲井華水井水如磨銅  
妾面似芙蓉照影返自歎淨洗鉛華濃  
郎騎白馬玉關去令人繡被冷春風  
春風欲盡來何遲蠶蛾散子鴟哺兒  
寫得短書無

寄處幽恨填膺淚如雨

墨染絲

縹絲自喜如霜白輸入官家吏嫌黑手持退印競傳呼  
倏見長條染深墨墨絲歸織家人衣別買輸官吏嗔遲  
寄言邊吏與三軍汝得豐衣民苦辛

苦雨行

陰風黑塞雲漫漫虛空晝夜騰波瀾羣龍淫怒煩神官  
銀河源源來未乾日月暗行天豈安地下萬物泥潦沈

角鷹快鵠摧羽翰小魚為鳳蛙為鸞君子有憂心盤盤  
欲上問天造化端蒼天無路不可干哀歌空屋聲何酸

曉晴歌

霜風刮刮侵人膚宿雲卷卷歸江湖天開碧幕萬里鋪  
飛出東來三足烏羽毛渾丹光焰敷地下萬物凍以舒  
我今踴躍行樵蘇白粳可糴酒可沽烏為母吾為雛致  
我之暖令我之鋪嗟不能報烏區區

麟州歎

邊兵不覺西人至  
麟州倉卒城門閉  
城中帶甲僅防城  
城外生靈任凋斃  
元戎底事不防秋  
千里郊原戰血流  
謾說知兵范僕射  
未免君王西顧憂

雲月歌

白雲微散月華生  
月下白雲和月明  
白雲猶解背人去  
明月只知隨我行  
我行不停月未落  
心期白雲出寥廓  
披雲揖月邀嫦娥  
願攜素手濯銀河

月下聽吟雲月歌  
歌聲寥亮舞婆娑  
勸君一酌千萬壽

今宵雲月情偏多，不知雲月誰為主。  
愁看月落雲飛去，願如明月有圓時。  
不學白雲無定處。

勸酒二首呈袁世弼

湛湛酒杯綠酣酣，炭爐紅佳人放玉板。  
拂鏡照芙蓉，四海無波瀾。  
吾曹方宴閒，大笑凌白日。  
高吟動南山，百歲能幾何。  
會少別離多，少年嗟賈誼。  
壯士憶廉頗，不如醉魂魄。  
冠巾任傾側，冥然逍遙鄉。  
杳與塵寰隔。

陰雲蔽白日，長風卷驚濤。  
江上崢嶸百怪吼，挽君船纜。

卷十六  
勸君住且飲百琰之醇醪吳姬笑臉如櫻桃鯉魚紅絲  
落霜刀醉來不識天為高共君攀天跨鯨鰲下視萬物  
皆勞勞

牡丹吟

三月金張啓仙館百種名花此尤罕昭君曉怯邊地寒  
太真晝卧華清暖夢為莊叟蝴蝶狂散作襄王雲雨短  
莫笑空山芝與蘭冷豔不隨金剪斷

左真觀



逸士騎魚入滄海石壇遺跡今猶在桂烟散景夜寥寥  
玉露凝華春璀璨重來舊隱經幾年挈笠攜鋤姓名改  
主人不識何當留墨灑梁塵爛星彩

事見本  
觀刻石

### 雜言寄耿天隲

耿夫子聞懸車齒清髮紺殊未老璨璨滿腹懷明珠  
隨黃雀啄官粟矯翼直與冥鴻俱東城之下言還舊廬  
田有秣稻池有嘉魚林有美木圃有青蔬笑傲樽俎俯  
仰琴書與其折腰以羣辱孰若潔身而自娛予將蹴陷

天之高浪跨橫海之長鯨攬午夜之明月邀逸駕于赤  
城酌王母之瓊液獻商皓之玉觥於是揮手景駐長嘯  
風生投冠纓于下土化鱗鬣于北溟也

琅琊行

琅琊異他山坡陀晦諸峯惟有山下水其源與天通尋  
源見樓閣鴛瓦青重重寶鏡遞華燈空巖散疎鐘薰成  
香積界回首非塵籠陽冰俗篆未足數禹偁八詠元無  
功我來獨酌惜已晚醉倒不見歐陽公摩挲蒼崖讀舊

記誰掣玉索纏蛟龍不憂石泐解磨滅斯文自與元氣  
同徘徊落日跨馬去老松為我搖悲風

交難

馬蕭蕭車輾輾道上行行人半相識識面雖多心友難滄  
海可量人莫測君不見張陳昔日刎頸交臨陣彎弓反  
相射又不見坐中耳語程將軍背罵一錢猶不直噫吁  
噉休休休猿鳥可為伴麋鹿可與游春日晴暉暉春風  
思悠悠春泉滑涓涓春林碧柔柔行止任所適歌嘯忘

吾憂逢人輒掩口語發多為讎

楊白花 二首

池水滿宮柳長邊地沙晴日色黃  
自知憔悴容華改朝來臨鏡懶梳妝  
却尋攜手舊游處拾得落花空斷腸  
秋風起黃葉飛宮門深鎖日還西  
背人一去音書斷塞雁無情亦解歸  
此恨此愁無處託暗塵消盡縷金衣

靈芝宮

曾子固傳  
王平父事

靈芝宮乃在滄海之上白雲之中樓閣縹緲金間碧玉

花露濕香隨風寒光長瑩別有月笙簫間作春冲融來  
時不託夢中路覺後唯聞長樂鐘神仙誰云與世隔暫  
游復返精誠通條然物化豈真往舉杯髣髴聲傳空蓬  
萊異館信非妄羅池廟食今猶豐仕途機穽了可畏天  
地雖廣身不容低催至死寄僧榻曠達一念起樊籠揮  
毫不似人間世想見光焰如長虹

圓山謠

廟食圓山忘歲年自言耽酒未能還身披羽衣手提藥

時時混迹來人間七言四句又奇絕固非俗士能追攀  
蓬萊却在漳水上鰲頭突起滄波環長蘿秀木鎖春色  
石泉自瀉秋聲潺伊予來漳四十日始造秘殿瞻威顏  
歸鞍未解疾遽作寒氣束縛形骸跼夜夢青衣捧玉盤  
琉璃十顆傳靈丹欣然投齒咀三四若飲沆瀣生脩翰  
精神頓覺枕上醒五鼓未送蟾光殘明朝視事若平昔  
僚吏爭賀詢其端真仙垂祐必終始凡骨豈易當珍丸  
便思勇決謝塵網往跨皓鶴參翔鸞吟詩賣藥同至樂

安用包羞拘一官

芳草渡

落日渡頭芳草碧傷如之何送行客客行無盡草相隨  
塞北江南同一色秋霜野燒年年事綠芽迸地先春力  
芳草多情不變常行人自去無消息

我歸矣

我歸矣江之南一蓑一釣桃花潭桃花潭水深千丈

李白

句金鱗尾尾密如蠶得魚輒笑放魚去我不貪餌爾何

貪移船就月還一飲天為方牀月為枕水紅芙蓉爛雲  
錦醉則縱橫看花寢看花寢如之何向來憂患付烟波

青山集卷十六



欽定四庫全書

青山集卷十七

宋 郭祥正 撰

五言律詩

四皓

彼美四賢老高風萬古寒去逃秦鼎鑊歸識漢衣冠  
翼翼羽翰就堂堂宗社安商山弊廬在還入白雲端

晚望

久客心嘗折登樓望轉迷風傾蘋葉亂雨重柳條低未

得趨金馬何當似木雞細尋鄉國路愁聽暝鴉啼

即事

北戶風欺幌南橋水拍城柳長無嫩色鶯老有新聲書  
帙看慵卷茶甌不厭擎故園何日返此地獨含情

幽居

春晚堪行樂幽居獨閉門忘形付詩酒吾道委乾坤壤  
壁蝸涎亂殘經鼠跡翻交游今已絕孤坐欲何言

江亭

江亭孤坐久野望眼偏明  
映日浮雲薄搖風細柳輕  
出牆新笋熟拍岸晚潮生  
遣僕沽春酒幽歡取次成

遣意

髮為烟嵐禿愁因患難添  
徑荒無過客筍迸任穿簷  
嗥雀誰能遣驚鳥不用占  
有巾堪漉酒聊欲效陶潛

春水

春水碧泱泱平堤映綠楊  
田疇資灌溉鷗鳥共徜徉  
放餌愁空掣浮杯興最長  
晚風吹細浪仍送落英香

早起

客愁偏早起，衰病愜晴明。  
索酒防春瘴，披衣聽鳥聲。  
舊書慵檢閱，新客懶逢迎。  
何日籠樊啓，再歸溪上耕。

初月

初月未成魄，瘴天雲霧低。  
浦昏船競入，林密鳥爭栖。  
褊性憐幽獨，香醪自挈攜。  
布衾今夜冷，猶得避兒啼。

可惜

可惜花飛盡，春歸客未歸。  
艱難行路險，老大賞心稀。  
翰

墨誰曾問漁樵與願違江干空駐目藜杖得相依

客禁

客禁何時釋驚魂夢裏歸深憂鄰虎穴那得並魚磯草  
色欣欣茂螢光箇箇微殘生苦多難搔首掩荆扉

卧柳

冉冉碧濠邊三株細柳眠根欹元著水葉大鎮藏烟不  
作棟梁用豈憂斤斧先春風任飄泊客意亦留連

水漲

山雨連朝注溪流沒草亭蛟鼉方汹汹鴻雁自冥冥只  
恐翻河漢終當見日星波瀾平地作嗟歎未曾經

水花

水畔花饒笑欹枝映小亭日光烘欲醉江色冷還醒淺  
白渾迷鷺殘紅尚襯萍幽人頗蕭索此地要頻經

西齋二首

西齋吾所構簷角頗依林瀟灑松篁影暄和燕雀音青  
春那肯住白髮任相侵稍悟淵明樂時時撫素琴

西齋吾所愛一徑綠蘿深終日聽新鳥令人忘故林地  
偏無客到山潤有苔侵禍患須安命優游不廢吟

南樓

兀坐南樓夜欄干俯列星村遙喧瓦鼓塔近震金鈴濕  
草埋昏瘴飛蟲接小螢物生皆有理吾亦委頽齡

自貽

自恨心肝拙題詩愈不工癡迷循磨蟻辛苦打窓蟲妙  
道知何補多言自取窮不如長寂默塊爾白頭翁

溪岸

溪岸逢春暮柔條儘意攀輕鷗翔近渚好鳥響空山小  
艇長欹側孤雲自往還遠遊成底事白首憶鄉關

要客

要客來何晚重乾漉酒巾玉琴虛別操藤榻恐流塵山  
暗蕭蕭雨花辭短短春杖藜慵緩步愁殺獨遊人

城南

淡沲城南路參差柳絆烟稻秧纔一寸蠶子始三眠曲



折藏花地暄和載酒天清江深有興只欲解歸船

夜興

日沒草堂陰收書復掛琴閉門人跡絕危坐客愁深  
星漢光鉅動湖山氣象沈嫦娥如借月蚊蚋莫相侵

夕陽

夕陽沈谷口海水接天南歸鳥自成陣暝山如半酣  
看雲貪仰面移杖忽遺簪幽獨誰相過人情老始諳

遷居

殊方留滯客，遷館避諠譁。  
破榻依寒竹，疎窓對晚花。  
燕歸疑識面，鳥噪默懷家。  
囊橐無書卷，新愁有五車。

交游

一作閩南客，幽憂忽過春。  
交游半卿相，蹤跡自埃塵。  
未附垂天翼，空成涸轍鱗。  
吾廬松菊在，悵望孰溪濱。

微寒

廣潦生寒夜，幽人獨倚樓。  
渚涯迷海若，燈火想漁舟。  
雷鼓蛙爭響，雲天月暗流。  
未應時序變，初夏反如秋。

旅食

旋煮青芹滑新炊白稻香僧居同淡泊旅食幸康強未  
擬沈湘水深防死未陽上書終自達聖世本虞唐

客問

來時麥未吐今見秀盈畦投奔還遭石登雲孰有梯爾  
讒徒似錦吾醉只如泥行止無勞問空山杜宇啼

廢閣

疊甃基猶在排空閣已摧燕愁尋舊棟蟻蠹傍新苔月

色閒圓缺風聲自去來廢興何可問劫火亦成灰

松風

夜寂松風度魂清客枕寒琴聲傳不盡詩句寫應難驟  
雨傾瑤砌真珠落玉盤隱居如可訪吾欲跨翔鸞

揮扇

四月長汀郭晴多暑氣濃欲眠難藉草選蔭必依松綠  
水遙思濯青雲底處逢西巖殘照盡揮扇待疎鐘

寓館

一徑松陰合重門院落深客來聽鵲喜春過惜鶯吟風  
月時經檻塵埃不到襟黃庭看在手白雪任盈簪

松檻

婆娑松與檻夾徑碧濛濛未辨雪霜操同霑雨露功低  
枝翻翠蓋垂葉密樊籠他日為梁柱掄材合至公

立夏

歲旦辭江國炎天客瘴鄉浴陂羣鳥白含霧野梅黃恨  
別山隨眼消愁酒滿觴殘魂終易斷回首只茫茫

深夜

四天垂翠碧一水湛星辰  
寂寞殊方夜漂流片葉深  
帝鄉勞夢想客路只風塵  
鐘鼓還催曉深慙釣渭濱

競渡

競渡傳風俗旁觀亦壯哉  
棹爭飛鳥疾標奪彩龍回  
江影渾翻錦歌聲遠震雷  
輕生一餉樂時序密相催

傷春二首

臘月花開盡中春不見花  
柳陰空拂地草色漫平沙  
客

路心常折僧窓鬢自華故鄉何處是瘴海暗天涯  
春雨時時暗春花眼未經生涯隨過鳥世態委浮萍瘴  
霧何由避蠻歌不忍聽誰家有醇酎吾欲醉兼醒

西池

雨漲西池水微瀾拍畫橋不愁蓮芡沒唯恐棟梁漂扶  
杖防危步移牀避晚潮何當風日爽一舞看纖腰

積潦

積潦連江海春撞說劒鋒郡城千丈拆民食五年凶雨

脚懸麻直雲頭潑墨濃忘機唯白鳥不解避蛟龍

自笑

自笑姑溪客還投瘴海邊不才無進路多病復殘年欲  
種千竿竹將求二頃田人生底事足且愛酒涓涓

喜晴

瘴鄉仍久雨生事念樵漁江海雲歸盡乾坤日上初短  
垣張澣服幽圃理殘蔬佐國知無術聊欣病體舒

城上



危步欲何適城頭獨杖藜  
水歸滄海後雲散暮天時  
秋色長空淡笳聲迴野悲  
泥沙埋熟稻一穗亦無遺

獨醒

野性惟憐酒無聊遂獨醒  
風塵雙白鬢天地一青萍  
鵬鳥寧須賦離騷未是經  
回頭付陳迹終欲醉冥冥

邸報

立法新三省論材只數公  
簿書期會正風俗見聞同  
邊塞瘡痍後朝廷氣槩中  
不才思獻賦天路恐難通

宦情

宦情寥落甚況在九溪邊瘴霧易成雨颼風偏覆船水  
殘餘盜賊村迴少人烟欲達中州信迢迢路六千

自遣

骨相殊屯賤無官只有階半生萍梗過兩鬢雪霜排去  
國腸空斷求田心未諧新交莫相笑中立一枝柴

西庵

一庵丹荔下更與畫橋鄰不許塵埃到每期風月親好

音聞度鳥斜影辨疎筠拂拭白藤榻欹眠穩病身

雨過

雨過添幽事褰裳步暖沙竹梢含淨霧藤刺罨輕槎  
鷗雙隨浪蜻蜓對覓花老夫詩思愜頗覺日沈車

野寺

野寺盤山腹高秋雨霽天拂簷雲漫漫穿竹水涓涓接  
食憐馴鳥堵筇慕老禪經年無客到門巷疊青錢

青山集卷十七

欽定四庫全書

青山集卷十八

宋 郭祥正 撰

五言律詩

晚晴

川漲那堪雨今朝喜晚晴幽花紫路重濁水止蛙鳴圩  
稻應全刈村醪可強傾吾雖無一畝亦足慰餘生

屏迹

屏迹已恨晚疲軀今自由百年無七十一日有千憂覓

酒開青眼憑詩遣白頭莫言賓客少池上兩三鷗

却卧

曉起梳頭畢開窓却卧時素烟收枕席紅日上藩籬仰面看書卷移牀近酒池紛紛萬方事安用老夫知

無客

病久人情厭經旬客不來簾因風力卷門待月華開柳上新蟬咽城頭暮角哀勞生隨物化孰免葬蒿萊

門巷

肅肅秋容淨蕭蕭門巷深荆榛原自合車馬少過尋問  
婢催蔬熟呼兒取酒斟藤牀未成寐野鳥噪歸林

賦分

賦分從來薄明時敢妄干六年悲對獄五十速休官水  
送雲天淨山開洞壑寒一枝能息影何暇北溟寬

農事

三歲悲農事官倉亦已貧勅書雖赦獄恩澤未蘇民南  
國供輸大中宵涕泗頻一心隨草木無復念沈淪

野望

暑雨收殘候秋雲結薄陰山光翠兼紫水影淨還深竹  
密羣鴉入天空一雁沈興來搔白首衰颯愧儒林

日暮

倚杖孤亭久無心辨俗訛暮山青掃淀秋漢白浮波岸  
震歸船鼓村喧刈稻歌未收西望眼問罪有干戈

歸燕

天外秋風勁梁間燕羽稀營巢雛未老何地汝成歸蜃



澤多樓閣茅堂無筭機故園春色動還趁社前飛

遣懷

節物驚心事搏金菊放花潛魚防餌釣高雁避城笳南  
浦秋風冷西江夕照斜異鄉消息斷林外更聞鴉

搗衣

清秋送殘暑隔屋忽聞砧遠震星河夜遙興關塞心欲  
知針縷密即是淚痕深他日功成後逢人寄好音

植杖

卷十八  
獨往憐漁艇羣飛愛暮鷗誰云天地窄自伴水雲游  
荇葉青爭老蓼花紅半收江頭人事絕植杖我何憂

空囊

牀有牛衣卧厨供石髓飡此身知是幻卒歲不為難  
冰合潛蛟冷雲深病鶴寒青錢無得選空掛一囊看

秋笛

清秋聞笛弄獨立露霑衣天外雲留住水中龍未歸  
悠揚聲益苦感激思何微不似前春聽梅花片片飛

黃山二首

秋物已瀟灑臨高念歲窮陣收羣雁沒峯斷片雲空月  
色山川內笛聲關塞中西人未柔服長策在諸公  
秋晚陟浮丘西臨古渡頭兵聲沈斷岸橋影散中流雪  
讓蘆花密雲排稻穗稠乾坤均帝力草木豈能酬

柴門

水落烟村迴柴門四五家晚風回斷雁寒雨側幽花世  
事紛無已人生自有涯鯨鼇真可釣吾興欲乘槎

復寒

三月閩南國陰寒變慘淒市樓添酒價山雨勒鶯啼  
田父憂春種商人怯路泥何當好風日稚子浴清溪

元輿攜酒見過三首

永日門常掩欣聞五馬過社餘巢燕入花散蜜蜂多  
望斷千山綠愁來兩鬢皤肝腸思一濯須藉酒為河  
酒味年來美攜觴約屢過交情貧始見詩思老仍多  
許國心常赤思家髮任皤誦君新得句秀色攬山河

沈毅陳夫子談兵孰與過運籌知必勝善將不論多漢  
陣千重黑邊沙萬里皤如聞洗戈甲誰為挽天河

雨中喜君儀要溫老希聖同見過二首

蕭蕭山寺雨漠漠暮雲寒不恨麻衣薄深愁酒盞乾離  
披花刺眼容易雪衝冠要客能相遇寧辭濕錦鞍

萬里鄉園別一春風雨多亂蛙聲鬪急歸燕舞綠何石  
榻昏苔蘚柴門暗薜蘿樛株方自笑忽枉故人過

謝君儀攜酒要客慰唁愁寂二首

佳客過窮巷良朋復可要  
靜緣碁局亂愁逐酒杯銷  
花底鶯聲度林間雨點飄  
晚春頻一醉何必擬松喬  
讒人未投北君子獨相親  
歲月驚春晚壺觴慰我貧  
松聲風外急山色雨中新  
一醉無歸夢寧論寂寞濱

白蓮啓日上人退避長老之命以四韻高之

結宇古城邊能詩復悟禪  
鉢分摩詰飯池種遠公蓮  
竹飈春烟靜禽歌夜月圓  
潔身吾有趣回首謝塵緣

送李絳伯華戶曹

國士苟微祿攜家千里行鄉關寒食節郵舍冷猿聲落  
日和雲盡離觴與淚傾銜冤仍送別何以慰浮生

和石聲叔留題君儀墓石亭二首

高才攄遠趣鑿石架危亭宿鳥依林白春苗接海青雲  
光隨箒亂泉響置琴聽況得少陵句宜鵲座右屏

因山基大石華榜揭高亭畦稻翻新綠山嵐浮遠青鳥  
行雲際度松籟雨餘聽安得吳生畫為予傳小屏

謝君儀寄新茶二首

建溪春物早正月有新茶得自參軍掾分來居士家輟  
開鬻玉餅湯濺白雲花一啜清魂魄醇醪豈足誇

北苑藏和氣生成絕品茶豈宜分旅館只合在仙家點  
處成雲藥看時變雪花琳琅得新句又勝玉川誇

曉起聞禽寄元興

幽鳥語清晨窓間宅禁人只知添白髮不覺度青春救  
過須三省觀空止一塵賢交如未棄時送濁醪醇

寒食感懷示子燾二首



柳暗青春暮鶯啼靜院陰鄉關隔寒食父子共沾襟未  
舉鵬天翼聊為鵬舍吟驚魂招不得時節感人深  
寒食金波淚他鄉此日心草連天際色泉斷隴頭音先  
冢三年別飛埃萬里侵只憑欹枕夢時到謝山陰

寒食元興見要南樓把酒

五馬登城堞平分載酒船無家寒食客小雨惜花天循  
撫恩何厚飄零命最遭閒愁不用遣一醉暫成仙

夜雨感懷二首

夜雨霽難霽溝塍復亂蛙輕寒侵病骨餘響答空階杜  
子嗟沾濕莊生失渚涯通宵不成寐歸思瀉長淮  
羽毛零落易摧傷父子同幽瘴癘鄉歸夢不成殘夜雨  
空階滴滴到愁腸

憶小子鼎

元朝別家去音信隔三春讀易應終卷端居莫患貧定  
交疎燕雀養節慕松筠冤獄何時辨思兒淚滿巾

排悶呈元輿

交態非今薄人情自古難  
弊裘甘我老雄劍請君彈  
魂逐雲峯斷心依酒海寬  
百年能幾許日月似跳丸

懷天鵬

築室君先隱窮途我正難  
流鶯春谷暖別鶴玉琴寒  
泉響經時聽雲光抵暮看  
異方空淚眼何日共幽歡

元興三月三十日致酒

衰病仍為客相依過一春  
和篇驚韻險把酒沃愁頻  
紫燕巢方穩黃鸝語尚新  
何時公赴召終欲託車輪

元興試北苑新茗

建溪雖接壤春末始嘗茶  
旋汲鄰僧水同烹北苑芽  
月圓龍隱鬣雲散乳成花  
貢入明光殿分來王謝家

別南樓

寄榻六十日朝朝上碧城  
雲光隨近遠山色變陰晴  
濠靜魚頻躍樓空燕不驚  
他時那復到欲去重含情

四月一日

有瘴從今始斯須雨復晴  
草蒸蛇肆毒榛密鵬嘗鳴  
晚

食宜防飽村醪可強傾何時擊歸鐙高眎歎浮生

俗傳晚食

不可令飽飽即中  
瘴須數飲以禦之

### 別濠上

自得莊生樂觀魚近碧濠觸萍時鼓鬣防餌不投刀柳  
挹春風靜鷗眠夜月高捨梅吾有適滄海釣鯨鰲

### 聞舊居教樂

昔作幽人宅今為舞女場燕驚絃管雜草避綺羅香  
靜雖殊致興衰自有常遙憐巖桂下誰拂讀書牀

登清音亭二首

已別城樓景還登樹杪亭地高鄰北斗山遠接南溟蟾  
影依雲斷樵歌隔浦聽客愁安用遣此處可忘形

薄暮杳何適高高登古亭地無南國瘴簾卷半空星石  
瘦長人立潭春皓雪停短才吟不就終欲付丹青

雨中懷元輿

暫阻龍山雨還思鳳閣人凌雲曾獻賦薄霧豈藏身酒  
釀公田秫羹調紫豉葍稍晴應見過酬唱莫辭頻

雨晴都按口號呈元輿

雨為華筵止晴牽飲興長  
管絃隨晝永羅綺散風香  
衛仗留春碧宮衣想赭黃  
明年今日事歸捧祝堯觴

青山集卷十八



欽定四庫全書

青山集卷十九

宋 郭祥正 撰

五言律詩

元興憐我復有漳南之行以麴局不可出遂置  
一樽託公域弟酌發眷眷之情於此可見矣  
以四韻謝元興并呈公域弟

憐我萬里別南荒多瘴埃身為官事隔酒託故人開飲  
德知難報論歡默可猜宗家有毛女冰潔勝寒梅

公域  
美姬

姓毛毛女  
古仙人也

與元輿論詩而風雨驟至

一作城頭飲重論別後詩條然雲雨至應有鬼神悲敘  
事公偏富求聲我最知賡酬三百首餘韻付咸池

元輿近詩加妙用寄四韻

誰識子昂孫新詩靄暮雲體兼諸謝備名與少陵分今  
去知無敵從來自出羣南山能射虎只許李將軍

謝元輿送鮮鯉煮酒

鮮鯉江湖味香醪日月春  
撫循時有贈飽暖遂忘貧  
玉縷空投筴金波漫入脣  
交情今乃見晚節共松筠

招孜祐二長老嘗茶二首

無物滋禪味來烹北苑茶  
碾成雲母粉香濺碧松花  
消渴梅何俗安神术謾誇  
清談嘗數椀莫笑老盧家  
昔人多嗜酒今我酷憐茶  
軟玉裁成餅輕雲散作花  
石泉助甘滑腸胃滌煩邪  
却怪少陵客曾無新句誇

追和故友袁世弼酬孜老四韻

坐諷湯休句閩南朱夏時碧雲生海嶠清吹散松枝救  
物寧論報安禪不履危江東飽芹蕨肯赴野人期

寄題建陽王祖聖朝奉南澗樓

郎省辭榮早樓居鶴髮翁響分南澗水清占北窓風紫  
府雲常近黃塵路不通何當陪杖屨有意學冥鴻

壺公山方卿墓亭

鄞國棠陰在壺山墓草黃慶源長不竭善訓永無忘燕  
雀春風裏烟雲碧瓦傍命書何日下潛德發幽光

至節日君儀見過誦思猿佳作

不赴郡樓宴能過野寺門  
撫循悲節物飄泊任乾坤  
瘴霧經霜盡溪潮向晚渾  
思猿有佳作敢為倒清樽

雨懷安止三首

春雨靈難霽春山阻俊游  
綠迷芳草恨紅濕落花愁  
古劒空彈缺疎簾懶上鉤  
何當生羽翼一日似三秋

身隔空山雨心同物外游  
成篇超俗格開卷釋新愁  
鸞鳳翔青瑣蛟鼉掛玉鉤  
重吟垂翼句春氣反如秋

雨隔陳夫子僧坊懶獨游  
閉門誰復過欲語已含愁  
病翼深防彈驚鱗遠避鉤  
交情君勿替松栢挺霜秋

聞惠休師將浮海如吳省寶覺禪師

去興已翩翩輕包赴海船  
霧收山翠濕月出浪華鮮  
鼓動看風力浮沈信佛緣  
何時達鍾阜重省寶公禪

雨霽懷進醇老

宿雨洗林扃開窓曉色清  
池深魚競躍花落鳥頻驚  
結友論三益營居共一城  
風騷真有意世事久無情

覽進醇老詩卷

羈栖海上州歲晚得師游句瀉碧潭月篇成清夜秋雲  
根龍洞鎖花氣蜜房收此理何人達營營枉白頭

同蕭英伯登淨惠寺山亭二首

策杖輕衣愜凭欄遠目明清江排暮釣綠野碎春耕嗜  
酒今非勇題詩尚有情薄游攀俊德唐相舊家聲

一徑穿林麓幽人借杖扶西山螺頂秀南塔筆鋒孤好  
鳥當花語輕烟襯草鋪登臨情未足暝色欲吞吳

又和英伯四首

亭出林巒表春歸氣象明江晴稚子浴田暖老夫耕弱  
柳禁風力游絲奈客情欲歸歸未得愁聽杜鵑聲

野興憐詩逸春醒要酒扶登臨同俊哲笑傲不羈孤日  
落金霞卷江翻雪浪鋪閩山又寒食何日到東吳

亭臨天外構春物望中明客興託詩酒野心憐釣耕露  
花如有恨風柳自含情何事子規鳥故為腸斷聲

閒亭當險絕疑有百神扶江靜羣鷗集天空一鶚孤落



英紅錦碎狂絮白氈鋪試問江南信歸帆至自吳

送惠休師浮海如吳

游吳興不淺真欲跨冥鴻豈畏海波險自明禪性空  
樓瞻北斗帆索張東風我欲江南去音書却易通

雨中酌君儀所送酒有懷

冬雷知不密地震復如何海角晴明少客心憂慮多  
白鷗欺浪舞黃鳥挾春歌幸有故人酒門深掩薜蘿

午日送酒與元興

前歲菖蒲酒臨汀共一樽迴思當觸網猶有未招魂抱  
義君偏厚餘生我尚存都城酬此酌佳節可重論

樂游軒呈運使陳大夫

狹徑通蕭寺牆開薜荔陰坐聞松籟奏歸待月華沈雅  
有賢人樂清無俗坐侵一軒寧久駐四海望為霖

西池水漫蓮葉資深勸予理之

短短芰荷葉深深野水漫何神能止雨無術理驚湍久  
客懷三徑包羞拘一官賞心那復數歲望骨毛寒

稍霽二首

稍止今朝雨猶埋瘴嶺雲亂流安可塞故老未嘗聞陰  
怪羣難數陽光晚漸分僅能存井邑不復念耰耞  
靈霖靈晝夜積潦接郊郭小艇家家有危椽處處扶稍  
晴人共喜却暖鳥爭呼海若一何暴幾翻天地樞

自和二首

已喜收微雨還愁合暮雲潮痕殊未減屋拆厭頻聞天  
地溟濛內山川早晚分吾民方乏食何以慰耕耘

猛風來半夜駭浪却平郭避地憂橋斷登山借杖扶馬  
牛真不辨老稚亂相呼安得瞻晴景蒼苔繡戶樞

淨惠橋亭為水所漂因勸寬老葺之二首

怊悵風兼雨西橋半夜摧青龍真變化白鳥漫驚猜蕩  
漚無遺跡登臨不再來道師如好事重為購良材

水漲西橋折重來路已差簷牙翻駭浪石脚没平沙夢  
想追塵迹湮沈歎物華何人能起廢壯觀老禪家

送陳輯都曹致仕還鄉

賦筆驚場屋高才歎陸沈  
宦遊今日盡野興暮年深  
黃菊看看秀青雲處處陰  
君懷能亢爽吾意亦侵尋

舟經彭澤謁靖節祠

彭澤江邊邑蕭疎靖節祠  
烟昏鹿皮畫草暗菊花籬  
詠德今千載言歸彼一時  
男兒要出處此道幾人知

竹子灘逢廣漕張公詡二首

泗水初傾蓋西江再逆舟  
策能課賊滅心不為身謀  
夜永談無寐樽空幸少留  
遲明還惜別飛槩下灘頭

會合嗟無酒留連漫索茶晚雲隨落日歸雁集寒沙自

達聊安命多言任指瑕吾宗有令弟恩復出君家

吾弟蒙正

為公美所薦

螺川送別王公濟朝奉還臺

亭上客送客江頭山映山白醪須酌盡彩鳳欲飛還帆  
轉疎林外烟生遠渚間離愁自堆積輒莫唱陽關

送郭晦叔知海州

凜凜汾陽秀螺川舊徙居文名動場屋孝節冠鄉閭御

史論才久方州躡等除朝廷終器使宗廟得璠璣

英州烟雨樓

江路分韶廣城樓壓郡東妓歌星漢上客醉水雲中  
潑墨天涵暝鋪綃月映空登臨逢此景不復念途窮

南山禪院

棟宇新成寺黃金貼翠微山眉一雙碧江帶兩條飛  
亂石森門戟晴雲作舞衣薰絃誰與奏松響瀉珠璣

廖華國史君致酒

飛蓋穿林外行厨就竹間酒狂思海瀉歌響遏雲還逸  
驥方騰躍疲驚強附攀磨崖記名姓長伴水潺潺

同穎叔修撰游吳圃分得須字

地與浮丘接花如錦帳鋪杜康傾琥珀海若獻珊瑚老  
竹爭抽笋幽禽自引雛人生行樂爾富貴亦何須

即席和穎叔送別四韻

二月溟濛雨春寒反似秋玉觥浮濁浪蘭橈擬滄洲自  
顧駑駘困寧攀逸驥游楚歌彈未徹歸思已難留



蔡梧州叙拜禮用四韻謝之兼送別

卓犖金閨客經過慰老夫能當韓子拜深愧孟生愚開  
卷詩千首論交酒一壺春風送和氣連夜入蒼梧

寄東莞李宰宣德

舊交幾人在寧嫌雙鬢皤一生長作客九死漫悲歌歲  
月驚秋速關山恨別多君須陟臺省吾欲隱松蘿

送象守賈正夫朝奉還臺二首

六載為南郡歸時雪滿顛一家纔度嶺單騎欲朝天介

潔終無玷精神老尚全十分愁別酒魂斷鵲亭前  
十載音書絕扁舟忽見過有樽傾別酒無妓唱離歌海  
濶春光少城空瘴霧多羨君先度嶺猿叫隔雲蘿

追和李白金陵月下懷古

唐格

歷覽古都會金陵冠南州天開鍾阜倚江轉玉繩流異  
代有興廢前賢歸塚丘草沒烏衣巷塵埋結綺樓城空  
龍虎踞臺罷鳳凰游默想秦淮月曾悲玉樹秋

和穎叔千歲棗

彼美祗園棗珍同玉井船後期千載熟今日萬珠圓地  
潤仍依佛欄深自羃烟結花雖最晚藏核莫如堅鴨脚  
看何小雞頭美未全種來誰共老服久必成仙大食移  
根遠番禺託蒂連舊名稽藥錄新賞著詩編甜出諸餠  
上香居百果前黑腰虛羨爾紅皺豈為然柔脆憐金鳳  
飄零難木綿諷芭丹荔賦精奪寶刀篇靜夜風回海清  
秋月蘸天綵山要客集翠顥繞枝駢邂逅為公壽婆娑  
與世延暮鐘催酒散嘶馬引旗旋今作中州瑞原從異

國傳何當廣栽植欲以慰饑年

廣福禪寺

寺與人寰隔西軒更遠瞻雲烟生卷箔星斗半垂簷山  
對眉雙碧江空鏡一奩旅魂招不盡愁向酒中添

馬仁山

在繁昌縣南舊名馬人唐德宗時石馬妖鳴斷其  
首以厭之易今名

崔嵬山下石如馬亦如人玉老龍蛇護庵空歲月新訪

僧非舊識覽壁但傷神更恨無流水難尋洞裏春



青山集卷十九

欽定四庫全書

集部

青山集卷

二十至  
二十三

詳校官中書

臣閔思毅

侍讀臣孫球覆勘

覆校官博士臣劉光第

校對官中書臣王璵

謄錄監生臣藍嘉璈

欽定四庫全書

青山集卷二十

宋 郭祥正 撰

五言律詩

同穎叔修撰登蕃塔

寶塔疑神運，擎天此柱雄。  
勢分吳越半，影插斗牛中。  
拔地無層限，登霄有路通。  
三城依作鎮，一海自橫空。  
禮佛諸蕃異，焚香與漢同。  
祝堯齊北極，望舶請南風。  
瑞氣凝仙露，靈光散玉虹。  
鐸音爭響亮，春色正冲融。  
筆添清



逸凭欄說困蒙更當高萬丈吾欲跨冥鴻

將至歷陽先寄王純父賢守

竹馬交游早星軺會遇難行年均坎坷撫已共悲酸鳳  
去鍾山暝龍沈洛水寒朝廷新日月風俗舊衣冠佳郡  
分符印脩途振羽翰樽醪千蟻汎樓瓦萬鱗蟠直節堅  
逾柏忠心赤奪丹才華僉論著功業鼎銘刊賤子初投  
甯收身即棄官生涯添鬢雪歲序走江湍造膝思陳榻  
論詩愧杜壇鷓鴣信微物聊假一枝寬

鄭致國宣義見過小山留飲敘舊

穀夫內相令子

一見翰林子悵然懷昨游盡為泉下鬼猶有水中漚

皇祐

京城之游  
惟予獨在

屏迹今雖久驚魂恐未收殘年唯伏枕幾月

不登樓促榻開青眼論詩慰白頭嶺雲遮薄暑江雨濕  
新秋疏飯慙無味星軺強少留會難真可惜老去只添  
愁明歲聞官滿高才副帝求功名隨會遇閤閱暢源流  
養大應知損安卑且尚柔不孤將有託吾說肯虛投

得瑞金暉評上人書因以酬之

野寺三秋別緘書一度收青開今日眼白盡昔年頭高  
義嗟難得勞生苦遠游新亭名六以真妄復何求

上人書云

林間新作小亭名為六以

### 寄題六以亭

以幻聊觀幻亭將六以名隔林風籟息滿地月華清不  
動超千劫隨緣度一生有時拈榔標劃斷野泉聲

### 立夏日示陳安國宣義

昨日春歸盡輕衣畏暑侵落花空眷影新葉自成陰晝

永惟便睡蟬清稍伴吟小團宮樣茗分酌莫辭深

攜酒就陳安國隱居小酌

家住逍遙國門無車馬音十分消睡茗一寸已灰心春  
去花應盡潮生岸恐沈徑須攜飲具來傍荔支陰

同崔員外訪陳安國隱居

共出塵埃外來尋董監家未能穿草屨且欲駕柴車谷  
斷雙橋險門荒一徑斜客心聊為洗石鼎煮新茶

書尋真觀王契元先生祠堂

久悟尋真訣應為蛻骨仙壽齡過九十功行滿三千舊

話皆如約

八年前先生見予約以九十二歲前尚可一見

知心信有緣相思一

盃酒和淚灑雲泉

寄九江陶子駿通直

家住廬山脚堂開佚老名清朝知止足白髮慰平生日  
月歸千載乾坤付一觥曾逢金馬客喚作小淵明

寄題程信叔朝散先墳思成堂歸真亭二首

水聚山仍合營祠構一堂丹青瞻邃表簪笏遍諸郎烟

雨和春暝松篁浥野

一作絕澗

香命書連歲下潛德發幽光

世澤從今遠音容杳莫期桃源春去後華表鶴歸時月  
慘烟雲晦風生竹樹悲登亭還灑涕千載景豐碑

題趙康州石聲編後

一賊鳴銅鼓孤城隕使星形骸糜矢石忠義貫丹青皎

皎張巡傳

聖俞表

新新李子銘

荆公誌

吾詩愧涓滴何以助

南溟

宿廣善院

峻嶺隔人世深雲藏寶坊  
龍鱗蟠碧瓦虹影卧雕梁  
道濟三塗苦齋餘七日香  
炎天蚊蚋絕此地信清涼

謝賈明叔侍御見過弊廬

不是少陵客寧煩謝子過  
雨昏窮巷柳風折小池荷  
至論鏗瓊玉幽情愛薜蘿

公屢愛陋  
居幽僻

朝廷容直道予亦樂

漁蓑

和胡與幾承議藏雲山雲際寺留題

山路入雲際山深雲更深  
老龍方晦角秀木不依林  
溪

溜冰生面泉泓月作心何須長抱石天下望成霖

上巳席上有贈

眸子剪秋水丹青畫不真誰知上巳日忽見潄紗人姑  
射長留月桃源別有春地衣新樣錦羅襪不生塵

賈侍御同游石盆寺以白玉船酌酒

共訪青山寺仍翻白玉船不憂身墜馬先覺口流涎水  
鏡初涵月雲峯半倚天新堂雖未就詩思已飄然

寄漳州陳昌國解元



為問陳昌國醇醪幾度春海中消息斷

予飲器名酒海舊詩云感君添

我海中春枕上夢魂頻舊恨隨流水新吟待故人何當騎鹿

去重笑九溪濱

送褚南翁赴潯幕

學行從來著官臨益有規衆人皆信謗惟我獨無疑萬里還趨幕三年且待時烟霄歧路在晚達未為遲

送劉彥思推官

入幕三年久還家萬里遙道孤誰汲引政善衆歌謠北

夢君方穩南魂我未招官醪不許買別恨幾時銷

郡禁  
官務

不得賣  
細酒

### 謝倪敦復惠酒

江雨今朝霽柴門爽氣高病餘逢七夕書至得雙醪飲  
德知無盡論心敢憚勞鳳團分賜茗持以報詩豪

### 喜胡展誠改官南歸

聞道扁舟至南歸得意人拜官臨百里增祿慰雙親所  
養應趨大能廉不患貧山家一樽酒聊為拂京塵

何明道宣德話所見龍作四韻志之

跬步雙龍起驚嗟莫遁藏冰鱗搖白影火鬣縱紅光穴  
地遺涎在排雲曳尾長不逢吳子畫想詠獨難忘

送南劔王倅奉議

何幸一身老親逢三世賢文章吾已盡閱閱爾能傳歸  
劔光生夜層樓影插天課書登善最漢殿席應前

和劉漢陽見寄郎官湖佳作

出郭湖光滿轉山湖影涼得名因太白起廢自劉郎石

鏡三更見荷花一丈長客來籌往事蘭草死猶香

和劉漢陽浩然亭

磴道通絕頂登臨懷弊廬山雲數峯斷江樹一行疎  
舊史名空在新亭畫不如自迷姑孰釣深愧漢陽書

雨中懷倪敦復因以密雲團寄之二首

曲巷無人至幽居覺日長數聲猜舊燕一縷惜殘香  
著雨花枝困欹風柳帶忙夢魂招不得惟是到君傍

三載久相依看看歎別離  
可堪江雨隔空對野梅悲息

迹無人問因禪與物違  
密雲新樣茗封送習家池

和朱行中龍圖游澄惠寺

一水碧漪漪更逢烟雨微  
草昏千步障松掛六銖衣  
冷翠光爭滴殘紅濕不飛  
自憐詩句拙空伴史君歸

夏寒

三伏當炎熱翻如九月天  
晨興重衣被夜宿盡防川  
船撼江聲怒樓侵雨氣纏  
白頭悲世態何以度殘年

元興待制招飲衣錦亭

宿雨消殘暑。嘶蟬引素秋。吟悲宋玉賦。醉倚仲宣樓。  
衣錦平時樂。藏舟戰國愁。蜀山斜照盡。歸興尚遲留。

元興待制藏舟浦宴集

聖世銷兵久。樓船不復藏。清瀾浮桂楫。紅袖薦瑤觴。  
荇菜風牽碧。荷花雨迸香。孔融真愛士。寧厭襴生狂。

合肥逢清璉上人

即圓通  
禪師弟子

閩國衣冠後。羌廬法性師。江河傾辨說。冰雪淨容儀。  
塔影龍蛇護。松聲猿鶴悲。門人忽相過。話舊涕空垂。

癸酉除夜呈鄰舍劉秀才

六十明朝是今年此夜除勞生一樽酒陳事數行書臘  
逐燈缸盡春回律管初不愁家信斷安穩藉鄰居

夜泛麻湖

片片冰消後盈盈月落初舟輕風勢急水濶雁鳴疎生  
事長飄泊愁懷自卷舒還憑過江夢一為省吾廬

保寧寺靜軒

隱几得真樂此軒深復深衆喧從過耳一法不關心雨

止溪添漲風行竹亂陰誰云非對動吾欲寫瑤琴

風

颯颯來何處空巖虎一聲蕩搖神女態飄忽楚王情有  
力疇能禦無根長自生掃除天際霧為放日車明

冬夜泊金山

寒野雲陰重新冬客意忙道途無處盡歲月有時長流  
落隨江海崩騰避雪霜還投白蓮社清淨萬緣忘

寄致政徐丞二首



為問徐夫子歸歟樂幾何  
宦情今日盡野興與雲多  
供佛延親壽開樽許客過  
終期卜鄰去松下按一作接長哦  
為問徐夫子身閒心若閒  
一樽陶令酒十頃謝家山  
雲外冥鴻去松顛獨鶴還  
令人起高興從此卜追攀

送叔父入川

霰雪滿江海破帆風易吹  
從今孤鳥興不及共巢時  
讒謗寧須辨神明豈易欺  
峽山雲木老莫動故園悲

送人赴巫山尉

薄宦杳何所令人重別離暮天歸鳥盡濕櫓渡江遲神  
女十分色襄王萬古悲到官無盜賊覽古數題詩

送許秀才二首

許子來何謂還家興未忘青山聊自愛白路不知長皓  
雪飄詩句寒星動劒鉞嗟予倦塵俗無術接翱翔

西風吹落葉片片旅人心半夜有歸興明朝雪滿簪濁  
醪聊惜別精藝少知音草店青山外解鞍孤月沈

送衡武陵赴闕

夫君老文學國士盡知音往奏相如賦休憐阮籍吟一  
樽江上酒千里日邊心人問武陵事桃花春水深

采石觀

江水流還

一作環

合山形到此孤突然樓閣聳疑有鬼神

扶門外橋蹤在沙邊王氣無我來何所得石上採菖蒲

康王觀

路絕蒼崖險橋橫大壑飛花殘啼鳥去雲重老龍歸劍  
珮塵埃化冠纓繪塑非客來空悵望魂斷夕陽西

三妓顧予幽獨戲作四韻

忤俗遭羅網何緣即掛冠  
閉門誰復過獨酌豈成歡  
客久添衰疾春餘尚苦寒  
幽花雖入眼不似故園看

贈臨江守范希遠龍圖

傾蓋相逢晚開樽上小樓  
感時心尚壯欲語涕難收  
神主方思治英才悉應求  
邦畿分使節玉陛邇宸旒  
溫密親聞詔精忠屢獻謀  
養兵能足食行縣必寬囚  
舜日期無盡堯雲遽莫留  
鼎湖龍化影銀海雁沈秋  
事畢身先

貶名高衆所尤一麾甘去國千里謾承流兄弟皆朱紱  
雙親未白頭遭讒雖坎坷安命亦優游雪意饒冬暖灘  
聲奈客愁須君作霖雨終附濟川舟

青山集卷二十